

# ODLUKA O PROPISIVANJU MJERA NEPOSREDNE KONTROLE CIJENA UTVRĐIVANJEM MAKSIMALNE VISINE MARŽI ZA POJEDINE OSNOVNE ŽIVOTNE NAMIRNICE I DRUGE PROIZVODE\*

("Službene novine Federacije BiH", broj 69/23)

## I.

Ovom odlukom Vlada Federacije Bosne i Hercegovine kao mjeru neposredne kontrole cijena na području Federacije Bosne i Hercegovine propisuje utvrđivanje maksimalne visine marži u trgovini (kalkulativne cijene) za pojedine osnovne životne namirnice i druge proizvode.

## II.

Mjere neposredne kontrole cijena iz tačke I. ove odluke odnose se na proizvode u nadležnosti Federacije Bosne i Hercegovine, kantona, grada i opštine propisane odredbama Zakona o kontroli cijena, kao i na ostale životne namirnice i druge proizvode koje prodaju svi učesnici u lancu snabdijevanja, odnosno privredna društva i druga pravna i fizička lica koja proizvode i obavljaju trgovinu na veliko i trgovinu na malo.

## III.

Pravna i fizička lica iz tačke II. ove odluke obavezna su utvrditi i primjenjivati marže tako da iste u veleprodaji i maloprodaji ne prelaze maksimalnu visinu marži u procentualnom iznosu na nabavnu cijenu.

Obaveza utvrđivanja i primjenjivanja marže iz stava 1. ove tačke odnosi se na sljedeće proizvode:

Red. br.	Naziv proizvoda	Jedinica mjere	Veleprodajna marža %	Maloprodajna marža %
1.	Pšenično brašno tip 550	kg	5	7
2.	Sve vrste hljeba od pšeničnog brašna (cijeli ili narezani)	kg	5	7
3.	Mlijeko kravlje, pasterizirano, homogenizirano i sterilno	litar	3	6
4.	Jestivo ulje suncokretovo	litar	5	6
5.	Šećer kristal, bijeli	kg	4	8
6.	Svježa konzumna jaja	kom	5	6
7.	Sve vrste svježeg mesa	kg	5	6
8.	Deterdžent za veš u prahu	kg	8	12
9.	Deterdžent za suđe tečni	litar	8	12

## IV.

Pod nabavnom cijenom proizvoda iz ove odluke podrazumijeva se fakturna cijena proizvođača, odnosno dobavljača umanjena za rabate i popuste (neto fakturna cijena) i uvećana za zavisne troškove.

Pod zavisnim troškovima podrazumijevaju se carinski troškovi, troškovi špediterskih usluga i ostali troškovi nastali prilikom uvoza, troškovi utovara i istovara proizvoda, troškovi transporta od stovarišta dobavljača do stovarišta kupca, troškovi osiguranja proizvoda u transportu, transportni kalo, lom, i kvar proizvoda, posebni troškovi pakovanja proizvoda u transportu, troškovi transporta od stovarišta kupca do njegovih prodavnica, odnosno prodajnih mjesta i troškovi povrata ambalaže na osnovu zaključenih ugovora.

## V.

Za realizaciju i nadzor nad provođenjem ove odluke zadužuju se federalna, kantonalna, gradska i opštinska tržišna inspekcija.

## VI.

Danom stupanja na snagu ove odluke, prestaje da važi Odluka o propisivanju mjere neposredne kontrole cijena utvrđivanjem maksimalne visine marži za pojedine osnovne životne namirnice i druge proizvode ("Službene novine Federacije BiH", br. 26/21 i 28/21).

## VII.

Ova odluka stupa na snagu narednog dana od dana objavljivanja u "Službenim novinama Federacije BiH".

\* Odluka je objavljena u "Službenim novinama FBiH", broj 69/23 od 8. septembra 2023. godine, a stupila je na snagu 9. septembra 2023. godine.